

**Datum objave: 8. 6. 2007. godine**

Na osnovu tačke I. stav 5. redni broj 1. Odluke o usvajanju Programa utroška sredstava sa kriterijima raspodjele sredstava tekućih transfera Federalnog ministarstva obrazovanja i nauke utvrđenih Budžetom Federacije Bosne i Hercegovine za 2007. godinu ("Službene novine Federacije BiH", broj 35/07), i Odluke o raspisivanju konkursa federalne ministrice obrazovanja i nauke, broj: 05-39-2812/07 od 6. 6. 2007. godine, Federalno ministarstvo obrazovanja i nauke, raspisuje

## **K O N K U R S**

### **za finansiranje naučnoistraživačkih projekata u Federaciji Bosne i Hercegovine u 2007. godini**

1. Konkurs se raspisuje za finansiranje naučnoistraživačkih projekata koji predstavljaju izvor novih naučnih ideja i saznanja i doprinose razvoju naučne misli tj. za fundamentalna i primjenjena istraživanja, kao i posebna istraživanja od interesa za Federaciju Bosne i Hercegovine.
2. Naučnoistraživačke projekte mogu prijaviti naučnoistraživačka pravna lica:
  - naučni instituti,
  - visokoškolske ustanove (univerziteti, fakulteti, visoke škole, akademije),
  - druga pravna lica registrovana za obavljanje naučnoistraživačkog i istraživačkorazvojnog rada.
3. Institucije koje podnose prijavu moraju raspolagati naučnoistraživačkim kadrom, naučnoistraživačkom infrastrukturom i opremom koja omogućava realizaciju projekta i postizanje utvrđenih ciljeva.

Sredstva se mogu koristiti:

- za finansiranje rada istraživača,
- za materijalne troškove projekta,
- za usluge neophodne za realiziranje projekta.

Predložena istraživanja planiraju se realizirati do 1. 7. 2008. godine.

4. Podnijeta prijava se sastoji iz dva dijela. Prvi dio prijave su podaci o podobnosti naučnoistraživačkog pravnog lica, te voditelja/voditeljice projekta i teme projekta, a drugi dio prijave sadrži opis i plan projekta (cilj projekta, učesnici projekta – biografija, bibliografija, saglasnost za učešće u projektu, metodologija istraživanja, rokovi, očekivani rezultati i detaljan finansijski plan ).

Savjet za nauku imenovan od strane federalne ministrice obrazovanja i nauke izvršice ocjenu naučnog sadržaja podnijetih prijava u pogledu podobnosti, originalnosti,

aktuelnosti, kvaliteta predloženih istraživanja, vrijednosti očekivanih rezultata, podobnosti podnosioca prijave i voditelja/voditeljice projekta, rokova i ukupne cijene projekta.

Drugi dio prijave bit će analiziran samo kod onih prijava koje zadovoljavaju propisane kriterije iz prvog dijela.

5. Voditelj/voditeljica projekta mora biti državljanin Bosne i Hercegovine sa prebivalištem u Federaciji BiH, naučni radnik/radnica sa naučnim stepenom doktora nauka iz oblasti u koju spada projekat, koji/koja ima najmanje 2 (dva) naučna rada objavljena u posljednjih 5 godina ili 3 (tri) rada bez vremenskih ograničenja u časopisima koje obuhvata relevantna međunarodna baza podataka za tu naučnu oblast. Dokaz o tome prilaže se uz konkursnu prijavu u vidu ispisa sa interneta.
6. U svojstvu voditelja/voditeljice projekta ne može biti angažiran penzionisani naučni radnik/radnica. Ovi istraživači mogu se angažirati u svojstvu člana tima ili konsultanta, odnosno vanjskog saradnika/saradnice.

Voditelj/voditeljica projekta ne može biti naučni radnik/radnica koji/koja obavlja izbornu funkciju u organima državne službe.

Voditelj/voditeljica projekta, član naučnoistraživačkog tima, konsultant i vanjski saradnik/saradnica ne mogu biti lica koja nisu uspješno završila projekat i/ili opravdala dodijeljena sredstva od strane Federalnog ministarstva obrazovanja i nauke po prethodno objavljenim konkursima.

7. Naučnoistraživački tim minimalno mora biti sastavljen od voditelja/voditeljice projekta i jednog mladog istraživača/ice do 30 godina starosti koji/a nema stepen doktora nauka u trenutku podnošenja prijave.
8. Budžet predloženog projekta može iznositi do 35.000,00 KM za tehničke, biotehničke, prirodne nauke i biomedicinu i zdravstvo, a do 20.000,00 KM za društvene i humanističke nauke, od čega za rad istraživača u bruto iznosu maksimalno do 50% odobrene sume.

Izuzetno, Savjet za nauku može, obzirom na značaj projekta, a na zahtjev podnosioca, predložiti odobravanje većeg iznosa za njegovo finansiranje.

Federalno ministarstvo obrazovanja i nauke će ugovoriti finansiranje cjelokupnog iznosa pozitivno ocijenjenog i prihvaćenog projekta.

9. Prilikom izbora projekata, prednost će imati projekti:
  - čiji voditelj/voditeljica imaju objavljene radove u časopisima obuhvaćenim sa Web of Science (baze CC, SCI EXPANDED i sl.),
  - koji uključuje naučnoistraživačku saradnju sa drugim naučnoistraživačkim pravnim licem iz Bosne i Hercegovine ili iz druge države,
  - institucije čije je projekte ranije finansiralo Federalno ministarstvo obrazovanja i nauke, a koje prilože dokaz da su rezultati tog naučnoistraživačkog rada objavljeni na način kako je to predviđeno ovim konkursom i koji su opravdali dodijeljena sredstva.

10. Sredstva se dodjeljuju bez obaveze vraćanja.

11. Voditelj/voditeljica odobrenog projekta i predlagač (institucija) su dužni podnijeti detaljan finansijski izvještaj o namjenskom utrošku sredstava u skladu sa odobrenim finansijskim planom, kao i izvještaj o toku i naučnim rezultatima projekta, Federalnom ministarstvu obrazovanja i nauke, Sektoru za nauku, u roku od 30 dana od dana završetka projekta.
12. Pozitivna ocjena Federalnog ministarstva obrazovanja i nauke o postizanju utvrđenih ciljeva izvršenog projekta, zasnovana na mišljenju Savjeta za nauku i namjenskom utrošku odobrenih sredstava, biće referenca za buduće finansiranje naučnoistraživačkih projekata istog naučnoistraživačkog tima, odnosno njegovih članova, od strane Federalnog ministarstva obrazovanja i nauke.
13. Projekat će se smatrati uspješno završenim ako naučnoistraživački tim u roku od 2 godine od dana potpisivanja ugovora sa Federalnim ministarstvom obrazovanja i nauke objavi rezultate projekta (naučni rad ili istraživanje) u nekom od referentnih časopisa obuhvaćenih sa «Web of Science» (baze CC, SCI EXPANDED i sl.). Pod „objavljenim radom“ smatrat će se i dokaz da je rad prihvaćen i da je u toku postupak objavljivanja.  
  
Prava na rezultate istraživanja, kao i prava na njihovo objavljivanje, intelektualna, vlasnička i druga prava regulisat će se Ugovorom o finansiranju i realizaciji naučnoistraživačkog projekta.
14. Prijave se podnose u dva (2) istovjetna primjerka na propisanim obrascima Federalnog ministarstva obrazovanja i nauke.
15. Konkurs ostaje otvoren 30 dana od dana objavljivanja u dnevnim listovima: „Dnevni avaz“, „Dnevni list“ i „Oslobođenje“.  
Tekst konkursa je dostupan i na web stranici Ministarstva: [www.fmon.gov.ba](http://www.fmon.gov.ba).
16. Propisani obrasci mogu se preuzeti na Protokolu Federalnog ministarstva obrazovanja i nauke u Mostaru, Ul. Stjepana Radića 33, u Uredu Ministarstva u Sarajevu, Obala Maka Dizdara 2, ili na web stranici [www.fmon.gov.ba](http://www.fmon.gov.ba). Dodatne informacije mogu se dobiti svakim radnim danom na telefon **036 355 749** u vremenu **od 14 do 16 sati** ili u sjedištu Ministarstva, Ul. Stjepana Radića br. 33, Mostar.
17. Prijave sa priložima se podnose u zatvorenoj koverti na adresu: **Federalno ministarstvo obrazovanja i nauke, Stjepana Radića 33, 88 000 Mostar**, sa naznakom „Za konkurs za naučnoistraživačke projekte – ne otvarati“.
18. Nepotpune i neblagovremeno prispjele prijave neće se uzeti u razmatranje.

MINISTRICA

Meliha Alić, prof.